

sto, che in questo mezo possi esser electo *etc.* Sier Zuam Arseni Foscarini andò a la Signoria dicendo, è contra le leze, *tamen* la Signoria mandò la parte, et fu presa.

Noto. Jo era ozi andato a Padoa a veder quelle fortificationom, et vene letere dil provedador Griti, di Montagnana, et una dil colateral zeneral, drizata a li rectori. Come per il campo era fama di la morte dil re di Franza, e questo era la causa di esser levà il campo francese, e andar ai alozamenti; et questa nova fo dita *etiam* a Venecia, e non fu vera.

A dì 10, la mattina. È da saper, per il colegio fo expedito, in questi zorni, il nepote di fra' Lunardo, chiamato Mariano da Leze, con fanti, et tutavia li fa, et mandato in campo.

Di la corte fo letere, di 7, di l'orator nostro, di Ancona. Dil zonzer li dil papa, qual vene di Rimano li. *Item*, anderà temporizando tra quelle terre, et colòquij abuti insieme. Comme à, il campo franse si risolve, et è andato a li alozamenti tutti. *Item*, a Bologna, quella comunità havia electo uno governador, el qual non voleva acetar senza el voler dil pontifice *etc.* *Item* ha aviso, il re di Spagna, per questo anno, non verà con l'armata, ma ben manderà qualche armata per le cosse di Africha. *Item*, zercha la paxe si trata con l'imperador per via di l'orator yspano, è a la corte. Chome, dito orator havia mandato a l'imperador e al suo orator yspano, episcopo di Catania, è a la corte, per aver mandato; el qual imperador era a Monaco, di là de Yspruch *etc.*

115 Dil provedador Capello, date al porto cesenatico, a dì 8. Chome per esser secho, e li arsilij non si pol acostar, hanno terminà cargar le zente d'arme a la Catholica, dove à mandato li arsilij e altri navilij. *Item*, voleno do page. *Item*, altre particolarità, *ut in litteris.*

Dil provedador Griti, da Montagnana, di eri. Chome 2000 spagnoli erano ussiti di Verona, capi do, *ut in litteris*; et 1000 di l'horo voriano venir a soldo di la Signoria nostra, et sono reduti fuora, tutti uniti, con molti venturieri, a presso l'horo zercha 2000; e quelli capi si chiama capetanio di ventura, et ha mandato a dirli, si la Signoria li vol, li servirà.

Fu posto far uno provedador zeneral in Friul, con ducati 80 al mexe, meni 8 cavali, et habbi pena a refudar. Et, fato il scurtinio, rimase sier Alvixe Mozenigo, el cavalier, savio a terra ferma, qual non era im pregadi; et il zorno sequente acceptoe. Il scurtinio sarà qui soto posto.

Fu posto, per li savij, una letera a l'orator nostro in corte, secreta; in materia di acordi si tratanò *etc.*

Fu posto, per li diti, una letera al provedador Capello, in risposta di sue, et quanto l'habi a far zercha le zente d'arme et fantarie.

Fu posto, per li savij tutti, che, atento a Nona sia stà alienà alcune cosse spetanti a la Signoria nostra, che siano tajade dite alienation et concession, *ut in parte.* Et sier Luca Trun andò in renga e contradise, dicendo, è bon saper a che modo è la causa, e, inteso, si vengi al consejo; et andò la parte, et non fu presa.

Di sier Sigismondo di Cavalli, provedador executor, vidi letere, drizate a Lunardo di Rizieri, date a Cologna, a dì 6 zugno. Come, in questa horra, era tornato di cavalcata con li cavali lizieri, da la volta di Lignago, per aver auto noticia che li inimici de li erano tutti in arme, per aver auto eri aviso, dal governador zeneral nostro, di tal ussita; e, oltra di questo, have el signal di Manerbe, che li inimici di Lignago erano fora. Per questi respeti li parse debito suo di cavalchar con quelli cavali lizieri a quella volta; et, zonto li, et mandato alcune vedete, ebbe aviso, diti inimici esser ussiti dal canto di là di l'Adexe, e, certificatosi, ritornoe al suo alozamento, dove trovoe uno messo, venuto li de Hostia, dal qual è avisato, che li homeni de Revere haveano conduto le robe sue di qua di Po, per il campo francese, che li a Revere dovea venir. Et eri matina se ebbe nova a Hostia, dito campo, zoè parte, era andato a la volta di Parma, el resto dovea passar in Sacheta, per venir a la volta di Verona; per la qual nova tutti quelli de Revere hanno comenzato a tornar le robe a le habitation sue. *Item*, questa note, have uno messo da Verona; come li era zonto, eri, stratioti 100, venuti dal campo francese; altro non era di novo *etc.*

Dil dito, date a Cologna, a dì 8. Come in 115* quella note, havia auto messo di Hostia, dal qual li è referito, esser li fama e certificarssi el re di Franza esser morto, e missier Zuam Giacomo di Triulzi esser andato con el campo versso Milam, salvo lanze 400, quale ha mandato a passar in Sacheta. Et questa matina, da uno Marco Alvixe Spiciale, da Lignago, qual vien di Hostia, è avisato, el podestà de dito loco haver hauto letera di aviso di la dita morte; et, per el dito, li fo afirmato, esser partito di Mantoa uno monsignor francexe, cuxin dil marchexe, qual va a la volta de Franza, per aspetar a lui la corona. *Item*, de li, a Cologna, è zonto parte de li stratioti,